

Eth grop d'Unitat d'Aran-PM-PSC, ara empara de çò que dispause er article 97.3 en relacion damb er article 91.4 deth Reiau Decrèt 2568/86 de 28 de noveme, Reglament d'Organizacion e Foncionament de Regim Juridic des Entitats Locaus, presente ath Plen deth Conselh Generau d'Aran era prepausa d'acòrd que seguís, qu'incorpòre ua Mocion de supòrt entà un Parc de Pompièrs de prumèra gessuda en municipi de Naut Aran.

PREPAUSA D'ACÒRD PLEN: APROBACION, SE PROCEDÍS, DERA MOCION DE SUPÒRT ENTÀ UN PARC DE POMPIÈRS DE PRUMÈRA GESSUDA EN MUNICIPI DE NAUT ARAN

Prumèr.- Aprovar era Mocion deth Conselh Generau d'Aran de supòrt entà un Parc de Pompièrs de prumèra gessuda en municipi de Naut Aran damb eth redactat que seguís:

Er Ajuntament de Naut Aran e er ensej des vesins des pòbles des Terçons d'Arties e Garòs e Pujòlo an reivindicat ath long des ans era installacion d'un Parc de Pompièrs en aquest municipi. Es darrèri huecs qu'an patit Salardú, Garòs o, anteriorament, Tredòs, manifèsten era potencialitat de risc qu'a aquest parçan especiaument en iuèrn, çò que reclame ua reflexion per part dera Institucion deth Conselh Generau d'Aran.

Istoricament, aquesta demana non podie èster satisfèta pr'amor dera dificultat d'arténher ua naua bastissa, damb es còsti qu'aquesta operacion supausaue. Totun, a dia d'aué, er Ajuntament de Naut Aran compde dejà damb espacis disponibles tà plaçar un Parc de Pompièrs de prumèra gessuda en Salardú. Un equipament qu'aurie de respóner as requeriments de celeritat e eficàcia que reclame era luta contra es huecs urbans.

Ei pr'amor d'açò expausat qu'es grops deth Conselh Generau d'Aran demanen:

- 1. Arribar as acòrds de besonh damb er Ajuntament de Naut Aran tà installar un Parc de Pompièrs de prumèra gessuda en municipi de Naut Aran.*
- 2. Abilitar eth personau voluntari requerit tà atier es besonhs de manteniment d'aquest parc atau com era sua disponibilitat tà efectuar es servicis corresponents.*

Arròs, 25 de junh de 2012